

Mas di 100 trahador Arubiano por perde trabao

Plantacion Bay mester mas garantia

ORANJESTAD (AAN) Gobierno te ainda no a tuma decision si lo duna mas garantia adicional na Hotel Plantacion Bay, asina DIARIO a ser informa pa un parlamentario cu ta sostene gobierno.

Plantacion Bay ta confrontando problema financiero serio cu e proyecto cu ta den su ultimo

fase di terminacion y manera e situacion tabata musta te cu ayera si pa otro siman gobierno no duna garantia adicional e proyecto lo no sigui.

E miembro di Parlamento cu ta sosten gobierno, a bisa cu aña pasa caba gobierno a duna garantianan adicional pa continuacion di e proyecto, pero awor e compania mester di mas

of menos 5 a 6 millon florin mas di garantia pa por termina e proyecto.

Gobierno hunto cu su conseheronan a reuni cu gerencia di Plantacion Bay pa tende e motibonan cu e compania mester di mas garantia adicional.

Segun e parlamentario awor si gobierno Hulandes ta pidi tur

informacion di companianan prome cu duna garantia adicional y esey no tabata e caso den pasado tempo di gabinete Eman unda cu garantianan tabata ser duna sin cu Hulanda pidi ningun clase di informacion.

Situacion ta serio y gobierno mester tuma un decision riba e situacion di Plantacion Bay y

alaves riba e garantianan cu a pasa mas di 500 millon florin.

Si pa otro siman gobierno no duna garantia adicional na Plantacion Bay lo no tin placa pa sigui e proyecto ni pa paga e trahadornan y como tal mas cu 100 trahador Arubiano lo perde nan trabao y e proyecto lo keda para.